

COMISIÓN INFORMATIVA DE TRANSPARENCIA E ADMINISTRACIÓN PROVINCIAL

ACTA da mencionada comisión informativa, correspondente ao día **19 de febreiro de 2020**

Na sala de xuntas do Pazo Provincial da Deputación de Ourense, ás 17.00 horas do día 19 de febreiro de 2020, reúnese a comisión informativa de Transparencia e Administración Provincial, coa asistencia dos seguintes deputados e deputadas:

Presidente: D. Plácido Álvarez Dobaño

Deputados/as do Grupo Popular:

D.^a Ana María Villarino Pardo

D.^a Consuelo Vispo Seara

D. Miguel Antonio Cid Álvarez

D. César Manuel Fernández Gil

Deputados/as do Grupo Socialista:

D.^a Elvira Lama Fernández

D.^a Rosario Rodríguez Delgado

D. Aurentino Alonso Araújo

Deputado de Democracia Ourensana:

D. José Miguel Caride Domínguez

Deputado do BNG: D. Bernardo Varela López

Deputada de Ciudadanos-Partido de la Ciudadanía: D.^a Montserrat Lama Nóvoa

Secretario: D. Francisco Cacharro Gosende

Interventor: D. José Mosquera Casero

Seguidamente, iniciouse o tratamento dos asuntos incluídos na orde do día, do xeito que se reflicte a continuación:

1º.- APROBACIÓN DA ACTA DA SESIÓN ANTERIOR, CORRESPONDENTE Á

ORDINARIA DO DÍA 22 DE XANEIRO DE 2020.-

Pola Secretaría Xeral deuse traslado do borrador da acta anterior, correspondente á ordinaria do día 22 de xaneiro de 2020.

Non se producen intervencións e por unanimidade a comisión adopta o seguinte acordo:

Aprobar a acta da sesión ordinaria da Comisión Informativa de Transparencia e Administración Provincial do día 22 de xaneiro de 2020, conforme co borrador elaborado pola Secretaría Xeral.

2º.- MODIFICACIÓN DA ORDENANZA REGULADORA DOS PROCEDEMENTOS DE SELECCIÓN DE PERSOAL FUNCIONARIO INTERINO E LABORAL TEMPORAL AO SERVIZO DA DEPUTACIÓN PROVINCIAL DE OURENSE.-

O Sr. presidente da Comisión expón o contido da proposta indicando que esta mañá negociouse coas organizacións sindicais no marco da Mesa Xeral de Negociación, e acordouse continuar a negociación ata o mes de marzo. Por todo iso, propónse ditaminar igualmente a proposta de acordo no seu actual estado e se houberse algunha modificación como resultado da negociación volveríase someter a informe no mes de marzo, xa que en todo caso o asunto non se tratará ata o Pleno de marzo.

D.ª Rosario Rodríguez Delgado, do Grupo Socialista, di que negociar esta proposta cos sindicatos é unha obriga legal para o goberno provincial polo que cren que este asunto debería retirarse e non ditaminarse ata que a negociación estivese concluída.

O Sr. presidente da Comisión di que si houbo negociación esta mañá pero que se decidiu ampliar o prazo da dita negociación.

Non se producen máis intervencións e co voto favorable do Grupo Popular (5) e de Democracia Ourensana (1), o voto en contra do Grupo Socialista (3) e a abstención do BNG (1) e de Ciudadanos-Partido de la Ciudadanía (1), a comisión ditamina favorablemente a adopción, por parte do Pleno, do seguinte acordo:

1º) Aprobar inicialmente a modificación da Ordenanza reguladora dos procedementos de selección de persoal funcionario interino e laboral temporal ao servizo da Deputación Provincial de Ourense, co seguinte contido:

a) Modifícase o dito artigo 8, que quedaría redactado nos seguintes termos:

Artigo 8. Tribunais de selección.

1. O tribunal de selección estará formado por seis membros, integrándose por un presidente, catro vogais e un secretario que actuará con voz pero sen voto. Designaranse ademais un mínimo de dous suplentes por cada membro titular do tribunal.

Os membros do tribunal deberán ter a condición de funcionario de carreira ou persoal laboral fixo de calquera administración pública ou de universidades públicas. A súa composición será estritamente técnica e deberán posuír unha titulación académica que acredite coñecementos nas materias que integren o temario do proceso selectivo. Na súa composición respectarase o principio de paridade conforme ao previsto no artigo 59 da Lei do emprego público de Galicia.

O secretario do tribunal será designado pola Presidencia, entre funcionarios do Servizo de Recursos Humanos da Deputación Provincial.

2. En todo caso, a participación nos tribunais terá carácter voluntario, polo que os empregados públicos interesados poderán manifestar a súa renuncia unha vez recibida a notificación da súa elección, entendéndose que aceptan se non comunican o contrario. En caso de renuncia, serán substituídos polo suplente elixido para tal fin.

Os membros do tribunal estarán suxeitos ás causas de abstención e recusación establecidas na lexislación de procedemento administrativo común. O incidente de recusación poderá formularse en calquera momento do procedemento anterior á data de realización das probas.

3. Os tribunais de selección actuarán con plena autonomía no exercicio das súas funcións, non estando suxeitos a instrucións de ningún tipo por parte dos órganos da Deputación. A Deputación porá á súa disposición os medios materiais que precisen para a realización do seu cometido. En casos xustificados, os tribunais de selección poderán solicitar a contratación de asesores técnicos especializados para a realización e avaliación das probas selectivas.

A data da sesión constitutiva do tribunal para o inicio das súas actuacións será establecida pola Presidencia da Deputación Provincial. A convocatoria do resto de sesións corresponderá á presidencia dos tribunais, por conduto da súa secretaría.

4. O tribunal de selección non poderá constituírse sen a presenza de máis da metade dos seus membros, sendo sempre necesaria a do presidente e do secretario. As súas decisións adoptaranse por maioría.

5. *Co fin de que a participación dos empregados públicos nos tribunais de selección non supoña unha redución da súa dedicación aos seus postos de traballo nas administracións públicas, os tribunais realizarán as probas selectivas e as súas reunións de traballo preferentemente fóra da xornada laboral dos seus membros. Todos os membros do tribunal de selección terán dereito a recibir as correspondentes indemnizacións ou axudas de custo de conformidade coa lexislación vixente.*

6. *O establecido neste artigo non lles será de aplicación ás comisións de valoración dos concursos para a formación de listas previas, que se rexerán polo establecido nas correspondentes bases reguladoras, con respecto, en todo caso, ao establecido na lexislación vixente para os órganos de selección de persoal.*

b) Modifícase a Disposición adicional segunda, que queda redactada nos seguintes termos:

Disposición adicional segunda

O disposto no artigo 8 da presente ordenanza seralles de plena aplicación aos tribunais de selección que se constitúan nos procesos selectivos de selección de persoal funcionario de carreira ou laboral fixo.

c) Modifícase a Disposición transitoria primeira, que queda redactada nos seguintes termos:

Disposición transitoria primeira

As normas sobre tribunais de selección establecidas no artigo 8 e na Disposición Adicional 2ª desta ordenanza serán de aplicación aos procedementos selectivos iniciados con anterioridade á súa entrada en vigor cando, no momento da dita entrada en vigor, aínda non se tivese procedido á designación dos membros do tribunal.

2º) O presente acordo someterase a información pública por prazo de trinta días hábiles, mediante anuncio inserido na sede electrónica da Deputación e no Boletín Oficial da Provincia., para a presentación de reclamacións e suxestións, que, no seu caso, deberán ser resoltas polo Pleno. No caso de non presentarse reclamacións ou suxestións en prazo, entenderase automaticamente elevado a definitivo o acordo de aprobación inicial.

Unha vez aprobada definitiva a modificación da ordenanza, procederase pola Presidencia á publicación do texto íntegro resultante da dita modificación no Boletín Oficial da Provincia, para a súa entrada en vigor.

3º.- MOCIÓN DO GRUPO SOCIALISTA PARA A CREACIÓN DUNHA COMISIÓN INFORMATIVA ESPECIAL DE INVESTIGACIÓN SOBRE OS CONTRATOS MENORES DA DEPUTACIÓN DE OURENSE.-

D. Aurentino Alonso Araujo, do Grupo Socialista, expón o contido da moción.

D.^a Montserrat Lama Nóvoa, portavoz de Ciudadanos-Partido de la Ciudadanía, di que está recabando información sobre este asunto polo que se reserva o voto.

D. Bernardo Varela López, portavoz do BNG, amosa a súa preocupación por esta cuestión e di que fai semanas que el solicitou un informe dos servizos xurídicos da Deputación Provincial sobre este asunto por considerar alarmante a información publicada. Pregunta cando se lle fará chegar ese informe.

D. José Miguel Caride Domínguez, portavoz de Democracia Ourensana, anuncia o seu voto en contra por razóns que explicará no Pleno.

D. Plácido Álvarez Dobaño, portavoz do Grupo Popular, anuncia o voto en contra do seu grupo indicando que en todo caso se procurará que ese informe se emita o antes posible.

Non se producen máis intervencións e co voto favorable do Grupo Socialista (3), o voto en contra do Grupo Popular (5) e Democracia Ourensana (1) e a abstención de Ciudadanos-Partido de la Ciudadanía (1) e do BNG (1), a comisión ditamina desfavorablemente a adopción, por parte do Pleno, do seguinte acordo:

- Crear unha Comisión Informativa Especial de Investigación sobre o procedemento de adxudicación dos contratos menores desta Deputación Provincial.

4º.- MOCIÓN DE URXENCIA.- Non se presentan.

5º.- ROGOS E PREGUNTAS.- Nesta quenda prodúcense as seguintes intervencións:

D.^a Elvira Lama Fernández, do Grupo Socialista, di que na sesión anterior desta comisión formulou unha pregunta sobre o programa EsquiOU e que se lle dixo que se lle ía a remitir un informe do Servizo de Deportes.

D. Plácido Álvarez Dobaño, portavoz do Grupo Popular, di que preguntará como está ese informe e procurará que se lle entregue o antes posible.

E, ás 17.20 horas, dáse por finalizada a reunión, redactándose a presente acta que se asinará electronicamente. Dou fe.

